

# Onverpersoonlikingsstrategieë in Afrikaans

## OUTEURSINLIGING

- 1. Prof Adri Breed** (korresponderende outeur)  
Vakgroep Afrikaans en Nederlands  
Skool vir Tale  
Noordwes-Universiteit  
E-pos: [adri.breed@nwu.ac.za](mailto:adri.breed@nwu.ac.za)  
Tel: 018 299 1563
  
- 2. Dr Daniël Van Olmen**  
Department: Linguistics and English Language  
Lancaster University, VK  
E-pos: [d.vanolmen@lancaster.ac.uk](mailto:d.vanolmen@lancaster.ac.uk)
  
- 3. Me Jo-Ann Chan**  
Vakgroep Grafiese Ontwerp  
Skool vir kommunikasiekunde  
Noordwes-Universiteit  
E-pos: [jo-ann@nwulettere.co.za](mailto:jo-ann@nwulettere.co.za)  
Tel: 018 299 4051

## Narratiewe curriculum vitea

**Adri Breed** is 'n NRF-gegradeerde medeprofessor in Afrikaanse beskrywende taalkunde aan die Noordwes-Universiteit. Sy spesialiseer in Afrikaanse sintaksis en semantiek, met 'n spesiale fokus op die grammatikalisering van tempus- en aspekkonstruksies in Afrikaans en ander Wes-Germaanse tale. Sy het vyf grade aan die NWU voltooi, naamlik Bedryfskommunikasie (B.BK, 2005), Teologie met Tale (B.Th. Tale, 2005), 'n Honneurs in Afrikaanse Taalkunde (B.A. Hons, 2007), 'n Meestersgraad in Afrikaanse letterkunde (M.A., 2007), en 'n doktersgraad in Afrikaanse Taalkunde (Ph.D, 2012). Tydens haar doktorsale studies



spandeer sy ongeveer tien maande aan Antwerpen Universiteit in België as medewerker van die *Center for Grammar, Cognition and Typology*. Sy is voorsitter van die Potchefstroomkampus se Vakgroep Afrikaans en Nederlands. Sy dien op die bestuur van die Suider-Afrikaanse Vereniging vir Neerlandistiek, en is lid van die PanSAT se Afrikaanse Nasionale Taalliggaam (ANLB). Sy is een van die outeurs en moderators van *Taalportaal* ([www.Taalportaal.org](http://www.Taalportaal.org)), en ook eindredakteur van die Virtuele Instituut vir Afrikaans (VivA) se *Taalonderrigportaal*.

**Daniël Van Olmen** is 'n medeprofessor aan die Universiteit van Lancaster (Verenigde Koninkryk). Sy navoring fokus op tempus, modus, modaliteit, pragmatiese merkers, onbepaalde konstruksies en ontkenning vanuit die perspektiewe van kontrastiewe taalkunde, taalkundige tipologie, historiese taalkunde, arealiteit en korpuslinguistiek. Hy het in internasionale tydskrifte gepubliseer oor onder andere "menslike onpersoonlike voornaamwoorde" in Wes-Germaanse tale, konstruksies van verwyd in die tale van Europa en prohibitiwiese ontkenningskonstruksies in die tale van die wêreld. Hy tree as mederedakteur op van akademiese



boeke wat handel oor grammatikalisering, taalkundige variasie en imperatiewe en direktiewe strategieë. Hy is tans een van die twee hoofredakteurs van De Gruyter se Trends in Linguistics - Studies and Monographs book series (<https://www.degruyter.com/view/serial/TILSM-B>).

**Jo-Ann Chan** is 'n dosent aan die Noordwes-Universiteit (NWU). Sy het 'n BA-graad (2013) en praktykgebaseerde Meestersgraad (2017) in grafiese ontwerp aan die NWU voltooi. Haar Meestersgraadnavorsingsprojek, naamlik *Visualising the voices of Redan: an experimental application of forensic anthropology and narrative identity to a disappearing landscape* het haar belangstelling in kunstenaarsboeke, illustrasie en interdisiplinêre praktyke ontwikkel. Saam met ontwerpopedagogiek vir tersiêre onderrig, vorm hierdie belangstellings ook haar navorsingsfokusse. Sy is aktief in die Suid-Afrikaanse kunstgemeenskap as 'n vryskutillustreerder en ontwerper, onafhanklike kunstenaar en lid van die ABC kunskollektief. Sy het al aan verskeie plaaslike groepuitstallings deelgeneem, waar haar werk die oorvleueling tussen die visuele en taalkundige modaliteite ondersoek. In 2019 hou sy haar eerste solo-uitstalling by die Wits Origins Center Museum in Johannesburg.



[geanonimiseer]

## Onverpersoonlikingstrategieë in Afrikaans

### ABSTRACT

#### Impersonalisation strategies in Afrikaans

In this article, we examine impersonal constructions in Afrikaans, i.e. constructions without a referential subject or, put differently, constructions where the (implicit) subject can be paraphrased as ‘people in general’, ‘someone’ or ‘some people’. This topic has already received considerable attention in the literature but the focus has generally been on a limited number of strategies, such as human impersonal pronouns (e.g. *mens leef net een keer* ‘one only lives once’) and the passive construction (e.g. *my kar is gesteel* ‘my car has been stolen’). In our view, this narrow focus in the literature is at least partly due to the limitations of the language-based research methods (e.g. corpus studies and questionnaires) currently used in the research. These methods essentially facilitate a deductive approach by investigating a predetermined set of more or less established impersonal constructions.

The present study, by contrast, adopts a more open-ended approach, to get a better sense of the range of possible strategies that speakers of Afrikaans can use in different impersonal contexts and of the constructions that they prefer to employ in those various impersonal uses. We therefore draw on a visual questionnaire with few linguistic cues. Each scene in this questionnaire depicts a particular impersonal context – based on the distinguishing criteria found in the existing semantic maps of the domain of impersonalisation (such as quantification, perspective and veridicality)

and respondents are encouraged to provide a sentence that captures the situation. The questionnaire was published online, promoted via social media and completed by more than 400 respondents.

The findings show first of all that there exist numerous alternatives to the well-known strategies of impersonalisation. In addition to pronouns (e.g. *jy* 'you' in *wat gebeur as jy die knoppie druk?* 'what happens when you press that button?') and passives (e.g. *is gepluk* 'were picked' in *terwyl jy geslaap het, is al die appels gepluk* 'while you were asleep, all the apples were picked'), the types of construction identified in our study include but are not restricted to: nouns with the meaning 'people' and an extra evaluative connotation (e.g. *morsjorse* 'litterbugs' in *morsjorse het gister hier gesit en drink* 'litterbugs were drinking here yesterday'), the generic use of the imperative (e.g. *onthou* 'remember' in *onthou om altyd jou sitplekgordel vas te maak!* 'remember always to fasten your seat belt!'), nominalisations (e.g. *koud kry* 'getting cold' in *die winter is vir koud kry gemaak* 'winter is made for getting cold') and free-choice constructions (e.g. *wie ookal* 'whoever' in *wie ookal gister hier sokker gespeel het, het hul bal vergeet* 'whoever played soccer here yesterday forgot their ball').

Our results are furthermore suggestive of the impersonal constructions that are clearly favoured by speakers of Afrikaans. They indicate, for instance, that the established but still comparatively under-researched strategy of passivisation is used across all impersonal contexts and is even regularly preferred to the better-studied pronouns in certain uses (e.g. *daar is al weer terreuraanvalle uitgevoer* 'terror attacks have again been carried out' instead of *hulle het al weel terreuraanvalle uitgevoer* 'they have again carried out terror attacks'). Indefinite pronouns too are found to be among the most common constructions – especially, though not only, in contexts assuming the

existence of a particular unidentified person responsible for some event (e.g. *iemand* 'someone' in *iemand het al die appels gepluk* 'someone has picked all the apples'). Nouns with the meaning 'people', finally, also appear to be quite favored by speakers of Afrikaans and they occur in a variety of impersonal uses, such as statements about people in general that do not, however, include the speaker or the addressee (e.g. *mense* 'people' in *in China eet mense rys* 'in China, people eat rice').

**Keywords:** impersonal; impersonalisation; agentless passive; human impersonal pronouns; universal; existential; impersonalisation strategy.

## OPSOMMING

Hierdie artikel ondersoek die verskillende strategieë wat Afrikaanse sprekers gebruik om aan te dui dat 'n konstruksie onpersoonlik is. Onpersoonlike konstruksies is konstruksies waar die (soms implisiete) subjek geparafraseer kan word as 'mense in die algemeen', 'iemand' of 'sommige mense'. Hierdie onderwerp het al baie aandag in die taalkundeliteratuur gekry, maar die fokus was meestal op 'n beperkte aantal onverpersoonlikingstrategieë, soos die gebruik van persoonlike voornaamwoorde (bv. *Jy leef net een keer*), onbepaalde voornaamwoorde (byvoorbeeld *iemand het my beursie gesteel!*) en passiewe konstruksies (byvoorbeeld *My kar is gesteel*). Volgens ons kan dié nou fokus in die literatuur toegeskryf word aan die feit dat die navorsingsmetodes (byvoorbeeld korpusstudies en vraelyste) wat tot op hede gebruik is om onverpersoonlikingstrategieë te ondersoek, navorsers slegs in staat stel om op deduktiewe wyse na die strategieë te kyk. Tot op hede is daar nog nie 'n studie uitgevoer om te bepaal i) watter *verskillende moontlike* onverpersoonlikingstrategieë deur Afrikaanse sprekers aangewend kan word nie, en ii) of daar bepaalde *voorkeure* vir sprekers bestaan oor watter strategieë om te gebruik in die verskillende en

onderskeibare onpersoonlike kontekste. Hierdie ondersoek beantwoord hierdie twee vrae deur die resultate van 'n *visuele vraelys* – wat aan ongeveer 450 Afrikaanssprekende respondente gegee is om te beantwoord – te bestudeer.

**Sleutelwoorde:** onpersoonlik; onverpersoonliking; agenslose passief; menslike onpersoonlike voornaamwoord; universeel; eksistensiële; onverpersoonlikingstrategie.

## 1 KONTEKSTUALISERING<sup>1</sup>

Onpersoonlike konstruksies kan gedefinieer word as konstruksies wat geen referensiële subjek bevat nie (Malchukov & Siewierska 2015:20). Onpersoonlike konstruksies het dus óf i) geen grammatikale subjek nie, óf ii) die subjek wat wel in die sin aangetref word, verrig slegs 'n pleonastiese funksie. Die subjek (hetsy gemarkeerd of ongemarkeerd) is dus inderwaarheid semanties leeg (vergelyk Siewierska 2008).

'n Subjek van 'n sin is met ander woorde onpersoonlik (semanties leeg) wanneer dit niereferensiële gebruik word, en nie na 'n gespesifiseerde persoon of groep persone verwys nie. Só 'n subjek kan geparafraseer word as 'mense in die algemeen', 'iemand' of 'sommige mense'.

Daar is hoofsaaklik twee niereferensiële kontekste waarin 'n subjek onpersoonlik aangewend word (vergelyk Gast & van der Auwera 2013). Eerstens is dit wanneer die

---

<sup>1</sup> Die eerste afdelings van hierdie artikel, sluit baie sterk aan by die kontekstualisering en teoretisering wat in Outeurs (ingedien vir publikasie) aangebied word. Die huidige publikasie lewer verslag van die resultaat van die vraelysontwerpproses wat in Outeurs (ingedien vir publikasie) omskryf word. Aangesien die kontekstualisering en teoretiese raamwerk ook vir hierdie artikel relevant is, word dit hier ook tot dieselfde mate en omvang aangebied.

subjek te generies is om na 'n spesifieke persoon of persone te verwys. Hierdie konteks word 'n *universele* onpersoonlike konteks genoem, en sinne 1 en 2 hieronder dien as voorbeelde<sup>2</sup>.

- 1 **Jy** leef net een keer, maar as jy dit reg doen, is een keer genoeg.
- 2 **Mens** mag nie foto's neem in die grotte nie.

Die konteks in voorbeeld 1 betrek álle persone in die mensdom. Voorbeeld 2 het betrekking tot alle persone wat relevant is tot die konteks, naamlik alle mense wat die grotte besoek. Mense wat nie die grotte besoek nie, word nie by die stelling ingesluit nie. Die sinsubjekte, naamlik *jy* in sin 1 en *mens* in sin 2, is dus in beide gevalle niereferensieel, aangesien dit 'n generiese of universele verwysing het na ongespesifiseerde persone.

Tweedens word 'n onpersoonlike subjek soms aangewend, omdat die spreker nie na 'n spesifieke persoon kán of wil verwys nie. Hierdie konteks word 'n *eksistensiële* onpersoonlike konteks genoem, en sinne 3 en 4 is voorbeelde hiervan.

- 3 **Hulle** sê trou is nie perdekoop nie.
- 4 **Hulle** het alweer jou ma se pos hier afgelewer, Elizabeth!

Die voornaamwoordelike subjek *hulle* in sin 3 verwys na 'n ongespesifiseerde groep mense wat op een of ander stadium 'n opinie oor die daad van trou uitgespreek het. Dit is egter nie vir die spreker moontlik om die presiese persone te identifiseer wat die uiting gemaak het nie. Eweneens word dieselfde voornaamwoord, *hulle*, in sin 4

---

<sup>2</sup> Alle voorbeeldsinne in hierdie artikel is geneem uit VivA Korpusportaal: Omvattend (VivA, 2020) of uit die vraelys se antwoorde. In sommige gevalle is sinne minimaal aangepas. Waar geskikte voorbeelde nie in die korpusportaal gevind is nie, is eie voorbeelde geskep. Eie voorbeelde word telkens aangedui.



gebruik om te verwys na die instelling of organisasie wat die pos afgelewer het. Die instansie is na alle waarskynlikheid bekend aan of afleibaar vir die spreker en die hoorder. Die spreker vind dit daarom nie nódig om die subjek op referensiële wyse te spesifiseer nie, aangesien dit uit die konteks duidelik is dat dit die subjek waarskynlik die Suid-Afrikaanse Poskantoor of 'n ander bekende koerierdiens is.

Daar is verskeie maniere waarop 'n Afrikaanse spreker 'n konstruksie onpersoonlik<sup>3</sup> kan maak, byvoorbeeld deur gebruik te maak van persoonlike voornaamwoorde wat onpersoonlik aangewend word (geïllustreer in voorbeeldsinne 1 en 5), onbepaalde voornaamwoorde (soos in voorbeeldsin 6), sommige naamwoorde of naamwoordstukke (byvoorbeeld sinne 2 en 7), of passiefkonstruksies (voorbeeld 8).

5 **Ons** moet altyd ons medemens respekteer.

6 'n Motor het nader gery en **iemand** het my daaruit geskiet.

7 **Die mense** wil behoorlike rugby sien.

8 Die skool se naam **is** in 1946 **verander** na die Paul Roos-gimnasium.

Onpersoonlike konstruksies is 'n gewilde studieonderwerp in resente taalkundenavorsing. Vergelyk byvoorbeeld onder andere die navorsing van Kitagawa & Lehrer (1990), Luukka & Markkanen (1997), Egerland (2003), Hoekstra (2010), Siewierska & Papastathi (2011) en Gast & van der Auwera (2013). Ook in Afrikaans het onpersoonlike konstruksies heelwat aandag gekry die afgelope paar jaar, byvoorbeeld deur Kirsten (2016), Van Olmen & Breed (2018a; 2018b), Van Olmen, et

---

<sup>3</sup> Die woord “onpersoonlik” het verskeie konnotasies in Afrikaans (Botha, 2019; Pharos, 2006). In hierdie artikel word die woord egter altyd gebruik om – binne konteks van beskrywende taalkunde – te verwys na gevalle waar die subjek nie op referensiële wyse na die 'n spesifieke persoon of groep persone verwys nie.

al. (2019), Outeurs (goedgekeur vir publikasie), Groenen (binnekort ingedien) en Fouché & Kapp (2020).

Die temas van hierdie genoemde navorsing – spesifiek ook die navorsing oor Afrikaanse onpersoonlike konstruksies – het egter byna uitsluitlik gefokus op voornaamwoordelike strategieë van onverpersoonliking. Slegs een Afrikaanse publikasie, naamlik Outeurs (goedgekeur vir publikasie), betrek ook 'n ander moontlike onverpersoonlikingstrategie, te wete die passiefkonstruksie. Tot dusver is min inligting beskikbaar oor die ander moontlike strategieë van onverpersoonliking. Daar is byvoorbeeld nog nie vantevore 'n ondersoek geloods om i) te bepaal *watter* verskillende strategieë daar tot Afrikaanse sprekers se beskikking is om kontekste as onpersoonlik uit te druk nie, en ook nie ii) watter onverpersoonlikingstrategieë Afrikaanse sprekers *verkie*s om bo ander strategieë te gebruik in verskillende onpersoonlike kontekste<sup>4</sup> nie.

Hierdie tweeledige leemte geld egter nie net in Afrikaanse taalkunde nie, maar ook vir navorsing oor ander tale. Naas Siewierska (2008) se artikel, *Ways of impersonalizing*, blyk daar tot op hede nie juis bronne beskikbaar te wees wat ten doele het om aan te toon watter *moontlike* onverpersoonlikingstrategieë daar vir taalsprekers beskikbaar is nie, asook nie wat die spesifieke *voorkeuronverpersoonlikingstrategieë* in die verskillende onpersoonlike kontekste is nie. Boonop lyk dit nie asof Siewierska poog om 'n omvattende lys van moontlike onverpersoonlikingstrategieë aan te bied nie,

---

<sup>4</sup> In die volgende afdeling van die artikel sal aangetoon word dat vir die twee onpersoonlike gebruike, naamlik die universele en eksistensiële onpersoonlike gebruike, ook meerdere kontekste onderskei kan word. Daar kan naamlik vier universele onpersoonlike kontekste onderskei word, en agt eksistensiële onpersoonlike kontekste (vergelyk Van Olmen & Breed 2019).

maar eerder op eksemplariese wyse te illustreer hoe verskillende tale onpersoonlike betekenis kan uitdruk. Hoewel sy 'n aantal strategieë aantoon wat nie algemeen in die literatuur oor onpersoonlike konstruksies aangebied of bespreek word nie, is haar voorbeelde hoofsaaklik gebaseer op beskikbare grammatikas en die insette van eerstetaalsprekers van verskillende tale. In die artikel word dus geen sistematiese of uitgebreide analise van 'n taaldatastel gemaak nie.

'n Moontlike rede vir die gebrek aan beskikbare navorsing oor moontlike onverpersoonlikingstrategieë, is die feit dat dit regtig uitdagend is om hierdie fenomeen in taalgebruik te ondersoek. Tot op hede is hoofsaaklik drie metodes gebruik om onpersoonlike konstruksies in spesifieke tale te bestudeer of te bepaal: eerstens word beskikbare grammatikas geraadpleeg of informele vrae aan eerstetaalsprekende taalkundiges gestel (bv. Siewierska 2011; Gast & van der Auwera 2013), tweedens word korpusse ondersoek, (bv. Marin-Arrese, Caro & Becerril 2001; Coussé & van der Auwera 2012), en derdens word sprekers van 'n bepaalde taal gewerf om 'n taalkundige vraelys in te vul (bv. Siewierska 2008; Garcia, Sallandre & L'Huillier 2018). Outeurs (ingedien vir publikasie) dui omvattend waarom hierdie metodes nie voldoende is om die verskillende moontlike strategieë van onverpersoonliking te ondersoek nie. Opsommend kan hier genoem word i) dat ál die metodes onpersoonlike konstruksies op deduktiewe wyse ondersoek, en dus aanneem dat alle moontlike onverpersoonlikingstrategieë reeds aan ons bekend is, ii) dat spesifiek 'n korpusondersoek na onverspersoonlikingstrategieë nie ideaal is nie, aangesien nie alle onpersoonlike kontekste frekwent in taalgebruik voorkom nie, en dus nie lei tot goeie taalkundige afleidings oor onverspersoonlikingstrategieë nie, en iii) dat die vraelyste wat tot op hede in navorsing oor onpersoonlike konstruksies gebruik is, die moontlike antwoorde van die respondente beperk tot bepaalde

woordkeuse of formulering. In die metodologieafdeling van hierdie artikel sal meer oor die laaste aspek uitgebrei word.

Die doel van hierdie artikel is om die twee gestelde leemtes vir Afrikaans te vul, naamlik om eerstens te bepaal watter moontlike onverpersoonlikingsstrategieë deur sprekers aangewend kan word, en tweedens te sien of daar bepaalde voorkeure vir sprekers bestaan oor watter strategieë om te gebruik in verskillende en onderskeibare onpersoonlike kontekste. Die hoop is dat die ondersoek na die Afrikaanse onpersoonlike konstruksies, ook bruikbaar kan wees vir ondersoeke na die onpersoonlike konstruksies in ander tale.

Hierdie artikel bestaan voorts uit vier dele. In die volgende afdeling, Afdeling 2, word 'n kort beskrywing gegee van die verskillende onpersoonlike kontekste wat op grond van bepaalde kriteria onderskei kan word. Afdeling 3 betrek die metode van ondersoek wat in hierdie projek aangewend word. Hier word kortliks aangetoon watter beperkinge vorige ondersoeke na onpersoonlike konstruksies in Afrikaans (en ook ander Wes-Germaanse tale) gehad het. Die afdeling sit ook kortom die aanpak van hierdie studie uiteen. Die vierde afdeling van die artikel bespreek die resultate van die ondersoek, en in die vyfde afdeling word 'n samevatting gemaak rakende die verskillende moontlike onverpersoonlikingsstrategieë wat Afrikaanse sprekers kan gebruik, asook watter strategieë voorkeur geniet bo ander in die onderskeie onpersoonlike kontekste.

## **2 TWAALF ONDERSKEIBARE ONPERSOONLIKE KONTEKSTE EN HUL BEPALENDE KRITERIA**

In Van Olmen en Breed (2018b) word – gebaseer op Siewierska & Papastathi (2011) en Gast & van der Auwera (2012) – twaalf onpersoonlike kontekste onderskei. Die kontekste kan van mekaar onderskei word op grond van sewe kriteria vir

onverpersoonliking, naamlik i) kwantifisering, ii) perspektief, iii) waarheidsgetrouheid, iv) modaliteit, v) (on)bekendheid, vi) getal en vii) spraakhandeling. Die verskillende onpersoonlike kontekste, sowel as 'n Afrikaanse voorbeeld van elkeen, word in die tabel hieronder aangebied, gevolg deur 'n kort beskrywing van die sewe onpersoonlike kriteria of maatstawwe.

	Onpersoonlike konteks	Afrikaanse voorbeeld
1	UNI-INT-NVER-NMOD	9 <i>Maar wat gebeur as mens afgedank word?</i>
2	UNI-INT-NVER-MOD	10 <i>Mens mag nie ondankbaar wees nie.</i>
3	UNI-INT-VER	11 <i>Jy leef net een keer</i>
4	UNI-EXT	12 <i>In Suidwes eet hulle nie pap en vleis nie.</i>
5	EXI-COR	13 <i>Gebruikers van die tunnel moet bedag wees op verskeie spoedkamas wat in die tunnel geïnstalleer is</i>
6	EXI-VAG-PL	14 <i>Jou hond is op 'n paar plekke in die dorp gesien. (eie voorbeeld)</i>
7	EXI-VAG-NN	15 <i>Iemand het sy klere gesteel.</i>
8	EXI-INF-PL	16 <i>As ons na die argeologiese bewyse kyk, sien ons hulle het 'n nedersetting hier gevestig. (eie voorbeeld)</i>
9	EXI-INF-NN	17 <i>Tinus botstil staan en wys na gebreekte takke en graspolle wat vertrap is. Iemand het hier geloop. (aangepas)</i>
10	EXI-SPE-PL	18 <i>Hulle klop gelyktydig aan die voordeur en die agterdeur. (eie voorbeeld)</i>
11	EXI-SPE-NN	19 <i>Ek is bietjie haastig. Iemand wag vir my langs die pad.</i>
12	SAV	20 <i>Hulle sê daar is bewyse dat lyfstraf 'n geweldskultuur vestig.</i>

TABEL 1: Twaalf onpersoonlike kontekste

Die eerste kriterium, naamlik **kwantifisering** (*quantification*), dui aan of die onderwerp van die sin 'n universele kwantifisering (UNI) het en van toepassing is op almal wat relevant is vir of in die spesifieke konteks ingesluit is (vergelyk voorbeelde 9 tot 12 hierbo) of dat dit 'n eksistensiële kwantifisering het (EXI) en aanvaar dat daar 'n spesifieke, maar nie-geïdentifiseerde (groep) individu(e) is waarop die toedrag van sake van toepassing is, soos in voorbeelde 13 tot 20.

**Perspektief** (*perspective*), as die tweede maatstaf, het betrekking op die spreker en/of die geadresseerde. Daar word gesê dat 'n onpersoonlike konteks as 'n konteks met 'n interne perspektief (INT) gereken word, wanneer die spreker hom- of haarself of die hoorder by die konteks inreken (vergelyk ook Gast & van der Auwera, 2013: 139). Sinne 9 tot 11 dien as voorbeelde van onpersoonlike kontekste met 'n interne perspektief. Daarteenoor is sin 12 egter 'n voorbeeld van 'n onpersoonlike konteks met 'n eksterne perspektief (EXT), aangesien die spreker en geadresseerde uitgesluit is by die perspektief.

Die derde maatstaf, **waarheidsgetrouheid** (*veridicality*), het te make met die waarheid van die toedrag van sake. 'n Konteks is waarheidsgetrou, oftewel veridies (VER), as die stand of toedrag van sake deur die spreker aangebied word as die waarheid of as geldend, soos in 11. 'n Konteks is niewaarheidsgetrou, oftewel neveridies (NVER) as daar nie aangeneem kan word dat die stand of toedrag van sake waar of geldend is nie, en met ander woorde slegs hipoteties is, soos in 9 en 10.

**Modaliteit** (*modality*), die vierde maatstaf, het te make met die modale of nie-modale vorm van 'n uiting. 'n Konteks is modaal (MOD) as die niewaarheidsgetrouheid daarvan deur middel van 'n modale vorm uitgedruk word, soos die werkwoord *moet* in 10. 'n Konteks is niemodaal (NMOD) wanneer die niewaarheidsgetrouheid daarvan op 'n ander manier oorgedra word as 'n modale uitdrukking, soos in die voorwaardesin in voorbeeld 9.

**(On)bekendheid** (*(un)knownness*), as die vyfde maatstaf, het betrekking op die hoeveelheid inligting rakende die (geïmpliseerde) subjek wat aan die spreker bekend is. Vier soorte (on)bekendhede kan onderskei word, naamlik i) deels bekend (*partly known*), ii) vaag (*vague*), iii) afgelei (*inferred*) en iv) spesifiek (*specific*). 'n Konteks is

**deels bekend** as dit min of meer duidelik is uit die toedrag van sake wie die persoon of persone is wat daarvoor verantwoordelik is, alhoewel hulle nie eksplisiet genoem word nie (vergelyk voorbeeld 13). In sulke kontekste word die term "korporatief" (COR) dikwels gebruik. 'n Gebruik is **vaag** (VAG) wanneer die spreker weet van die spesifieke gebeurtenis wat beskryf word, maar nie die spesifieke persoon of persone wat daarvoor verantwoordelik is, kan identifiseer op grond van die beskikbare bewyse nie, soos in 14 en 15. 'n Gebruik word **afgelei** (INF) wanneer die werklike gebeurtenis nie bekend is nie, maar afgelei word van enkele tekens of bewyse in die situasie en die bestaan van die persoon of persone wat dit veroorsaak het, word ook aanvaar, soos in sinne 16 en 17. Laastens is 'n gebruik **spesifiek** (SPE) wanneer die spreker op dieselfde tyd en plek is as die persoon of persone wat die geleentheid daar en dan voltrek, en daarom 'n sterk vermoede kan hê oor wie die persoon of persone is, maar steeds nie identifiseer nie, soos in sinne 18 en 19.

Die sesde maatstaf, **getal** (*number*), dui die aantal mense aan wat by die (geïmpliseerde) subjek ingesluit is. 'n Gebruik is meervoudig (*plural*) (PL) wanneer die onderwerp net meer as een persoon kan wees, soos in sinne 14, 16 en 18. 'n Gebruik is getalneutraal (*number neutral*) (NN) wanneer die getal van die (geïmpliseerde) subjek nie bekend is nie en dit kan een persoon of meer as een persoon wees, soos in sinne 15, 17 en 19.

Die sewende en laaste kriterium het te make met 'n gebruik waarin 'n **spraakhandelingwerkwoord** (*speech act verb*) (SAV) soos 'sê' en 'beweer' voorkom en die (geïmpliseerde) subjek maklik deur 'mense' vervang kan word. Dit het 'n bewysfunksie deurdat die spreker 'n uiting toeskryf aan 'n onbepaalde stel individue. Sin 20 is 'n voorbeeld.

### 3 METODE VAN ONDERSOEK

Soos vroeër aangetoon, kan bepaalde beperkinge uitgelig word in die wyse waarop vorige metodes onpersoonlike konstruksies probeer bestudeer het. Naas die feit dat die genoemde metodes nie geleentheid bied vir navorsers om moontlik n uwe of onbekende onverpersoonlikingstrategie  te identifiseer nie, en ook naas die feit dat korpora nie altyd genoegsame voorbeelde van al twaalf onpersoonlike kontekste bevat nie, is ook die vraelyste wat tot op hede gebruik is, te beperkend om werklik tot sinvolle insigte te lei rondom nuwe of voorkeurstrategie  van onverpersoonliking.

Die vraelysgebaseerde ondersoek van Van Olmen en Breed (2018a; 2018b) kan hier as voorbeeld dien om die beperkinge rondom die gebruik van vraelyste om onverpersoonlikingstrategie  te ondersoek, te illustreer. In hul studie is 'n sogenaamde "dubbelvraelysgebaseerdebenadering" gevolg. Met ander woorde, twee verskillende vraelyste, naamlik 'n aanvaarbaarheidsoordeeltaak (AOT) en 'n voltooiataak (VT), is gebruik om data in te samel rakende onverpersoonlikingstrategie  in drie Wes-Germaanse tale – Afrikaans, Nederlands en Engels.

Albei vraelyste is ontwerp om die gebruik van verskillende persoonlike voornaamwoorde in twaalf onpersoonlike kontekste deur sprekers van elk van die drie tale te toets. Elke konteks is geskommel aan die respondent aangebied as twee verskillende scenario's. Die vraelys het dus uit 24 vrae bestaan. Die respondente moes dan, afhangende van die vraelys wat hul beantwoord, 'n spesifieke taak uitvoer om die aanvaarbaarheid van 'n spesifieke onpersoonlike voornaamwoord te toets of hul eie voorkeuronverpersoonlikingstrategie te verskaf (maar beperk tot voornaamwoordelike of naamwoordelike strategie).

Figuur 1 is 'n uittreksel uit die Afrikaanse AOT.



Jy en jou vriendin vat jou kinders een oggend parkie toe om te gaan speel. Daar lê 'n klomp leë bierblikkies in die parkie rond en jy sê vir jou vriendin:

	1	2	3	4	5
"Mens het hier bymekaargekom vir 'n partytjie."	<input type="radio"/>	<input type="radio"/>	<input type="radio"/>	<input type="radio"/>	<input type="radio"/>
"n Mens het hier bymekaargekom vir 'n partytjie."	<input type="radio"/>	<input type="radio"/>	<input type="radio"/>	<input type="radio"/>	<input type="radio"/>
"Man het hier bymekaargekom vir 'n partytjie."	<input type="radio"/>	<input type="radio"/>	<input type="radio"/>	<input type="radio"/>	<input type="radio"/>
"n Man het hier bymekaargekom vir 'n partytjie."	<input type="radio"/>	<input type="radio"/>	<input type="radio"/>	<input type="radio"/>	<input type="radio"/>
"Hulle het hier bymekaargekom vir 'n partytjie."	<input type="radio"/>	<input type="radio"/>	<input type="radio"/>	<input type="radio"/>	<input type="radio"/>
"Jy het hier bymekaargekom vir 'n partytjie."	<input type="radio"/>	<input type="radio"/>	<input type="radio"/>	<input type="radio"/>	<input type="radio"/>

*Figuur 1: Uittreksel uit die Afrikaanse aanvaarbaarheidsoordeeltaak van Van Olmen & Breed (2018a; 2018b)*

Soos hierbo gesien kan word, is verskillende scenario's wat die onderskeibare onpersoonlike kontekste uitbeeld, aan die respondent voorgehou. Die respondent is daarna gevra om op 'n skaal van 1 tot 5 aan te dui (1 is heeltemal onaanvaarbaar en 5 is heeltemal aanvaarbaar) tot watter mate hy of sy die gebruik van elk van die verskillende Afrikaanse voornaamwoorde in die gegewe konteks aanvaarbaar vind.

Figuur 2 is 'n uittreksel uit die Afrikaanse VT.

8. Jy en jou vriendin vat jou kinders een oggend parkie toe om te gaan speel.  
Daar lê 'n klomp leë bierblikkies in die parkie rond en jy sê vir jou vriendin:  
" \_\_\_\_\_ het hier bymekaargekom vir 'n partytjie."

Jou antwoord \_\_\_\_\_

*Figuur 2: Uittreksel uit die Afrikaanse voltooiataak van Van Olmen & Breed  
(2018a, 2018b)*

Die VT was gebaseer op dieselfde twaalf kontekste (wat twee keer in verskillende scenario's aangebied is en dus net soos die AOT uit 24 vrae bestaan het). Die verskil tussen die AOT en die VT was egter dat die sintaktiese posisie waarin die verskillende persoonlike voornaamwoorde in die AOT aan die respondente voorgehou is, in die VT oopgelaat is. Die respondent moes sy of haar eie moontlike antwoord verskaf. Met ander woorde, die voorbeelde hierbo dui aan hoe die VT gebruik is om te bepaal wat die voorkeurstrategie van elk van die respondente in die EXI-INF-NN-konteks sou wees (vergelyk weer Tabel 1). Dit sou dus vir die respondent moontlik gewees het om 'n persoonlike voornaamwoord soos *jy* en *hulle* in te vul, maar ook 'n ander moontlike strategie, byvoorbeeld 'n onbepaalde voornaamwoord soos *iemand*. Die VT was egter beperk tot onpersoonlike strategieë wat as subjek funksioneer, en dit was nie vir die respondent moontlik om die antwoord te herskryf of te herformuleer nie. Dit was byvoorbeeld nie moontlik vir die respondent om 'n passiewe antwoord te gee in plaas daarvan om 'n voornaamwoordelike of naamwoordelike subjek te gebruik nie.

'n Vraelysbenadering is egter steeds voordelig vir taalkundige studie, aangesien dit o.a. ruimte laat om – soos inderdaad die geval is met sommige onpersoonlike kontekste – taalstrukture te ondersoek wat nie frekwent in taalgebruik, en derhalwe in

korpora, voorkom nie. Indien dus van 'n vraelys gebruik gemaak word om eerstens die *moontlike* en tweedens die *voorkeurstrategieë* van onverpersoonliking in Afrikaans en ander tale te bestudeer, moet 'n vraelys gebruik word, wat i) nie die moontlike talige antwoorde van respondente beperk nie, ii) in staat is om enige moontlike onverpersoonlikingstrategie te akkommodeer, iii) geen bevooroordeelde, leidende of beperkende taalkundige leidrade of instruksies bevat nie, en iv) rekening hou met al die kriteria waarvolgens die twaalf onpersoonlike gebruike van mekaar onderskei word.

Daar is dus besluit om vir hierdie projek 'n soortgelyke vraelys as dié van Van Olmen en Breed (2018a, 2018b) te ontwikkel. 'n Ander benadering word egter gevolg: In plaas daarvan om die onpersoonlike kontekste in die vraelys aan te bied in die vorm van geformuleerde beskrywings van scenario's, word die kontekste egter eerder as visuele voorstellings aangebied. Respondente sou dus die kontekste kon evalueer en antwoorde kon bedink sonder om 'n spesifieke formulering hoef te gebruik.

Figuur 3 is 'n uittreksel uit die visuele vraelys wat vir hierdie projek ontwerp<sup>5</sup> is. Die konteks wat aangebied word, is ook – net soos die uittreksels uit die AOT en VT – van 'n EXI-INF-NN-konteks. Die doel van hierdie visuele vraelys was uitsluitlik om i) 'n

---

<sup>5</sup> Hierdie projek het die vorm aangeneem van 'n samewerkende, interdisiplinêre projek wat gegrond is in die taalkundeteorie oor onverpersoonliking en die visuele kommunikasieteorie op woordlose visuele narratiewe (*wordless visual narratives*) (vergelyk Nodelman 1990; Horwat 2018:176; Arif & Hashim 2008:121). Die interdisiplinêre groep van agtien medewerkers bestaan uit twee taalkundiges, een dosent in grafiese ontwerp en vyftien studente in die grafiese ontwerp. Die ontwikkeling van die vraelys is uitgevoer as 'n praktykgebaseerde navorsingsprojek, met die onderrig- en leerdoel om studente in grafiese ontwerp op te lei om die beperkinge en interaksies van 'n kliëntopdrag te navigeer. Die twee taalkundiges het die rol van die kliënt aangeneem en die kommissieopdrag het gestel dat die vyftien studente, onder leiding van hul dosent, verantwoordelik was om die visuele voorstellings van die onpersoonlike gebruike wat as 'visuele vraelys of aanwysings' gebruik sal word, te illustreer vir die vraelys. In Outeurs (ingedien vir publikasie) word hierdie ontwerp- en evalueringsproses omvattend beskryf, en word daarom nie in hierdie artikel verder bespreek nie.

verskeidenheid van *moontlike* onverpersoonlikingstrategieë te identifiseer, en ii) te sien of sprekers bepaalde voorkeurstrategieë aanwend in sekere onpersoonlike kontekste.



[0.098] Formuleer asseblief die stelling wat in die spraakborrel gemaak word. Gebruik asseblief die werkwoord "drink"/"gedrink" en die woorde "hier" en "gister" in jou antwoord. \*

Jou antwoord

*Figuur 3: Uittreksel uit die visuele vraelys oor onverpersoonlikingstrategieë*

Die visuele vraelys het bestaan uit 12 vrae. Elke vraag het een van die twaalf onderskeibare onpersoonlike kontekste deur 'n visuele illustrasie voorgestel. Die

voorstelling van die SAV-konteks het egter te min bruikbare antwoorde opgelewer, en word derhalwe nie by die resultate ingesluit nie. Ter wille daarvan om soveel as moontlike bruikbare antwoorde te bekom, is die illustrasies ook met kontekstuele leidrade toegelig. Die kontekstuele leidrade was meestal slegs 'n versoek dat die respondent 'n spesifieke werkwoord, en soms ook 'n bykomende bywoord of naamwoord moet gebruik om die visuele voorstelling te beskryf. 'n Kopie van die elektroniese vraelys wat aan respondente voorgehou is, kan aanlyn<sup>6</sup> beskou word. Figuur 3 hieronder bied voorbeelde van geskikte antwoorde wat deur respondente aangebied is wat die visuele vraelys beantwoord het. Elkeen van die antwoorde beskryf 'n ander onpersoonlike konteks.

---

<sup>6</sup> Die vraelys kan by die volgende skakel beskou word: <https://forms.gle/WgNaFXWhoojKejKo9>

	<b>Onpersoonlike konteks</b>	<b>Geskikte voorbeelde vanuit antwoorde van visuele vraelys</b>
1	UNI-INT-NVER-NMOD	21 <i>Wat gebeur as mens dié rooi knoppie druk?</i>
2	UNI-INT-NVER-MOD	22 <i>'n Mens moet altyd jou sitplekgordel vasmaak as jy motor bestuur.</i>
3	UNI-INT-VER	23 <i>Almal kry koud in die winter.</i>
4	UNI-EXT	24 <i>Mense in China eet baie rys.</i>
5	EXI-COR	25 <i>Hulle werk alweer aan die pad.</i>
6	EXI-VAG-PL	26 <i>Hulle het terreuraanvalle op n paar plekke in die stad uitgevoer.</i>
7	EXI-VAG-NN	27 <i>Iemand het al die appels gepluk terwyl jy geslaap het!</i>
8	EXI-INF-PL	28 <i>Lyk of iemand gister hier sokker gespeel het.</i>
9	EXI-INF-NN	29 <i>Hulle het natuurlik gister hier gedrink en nie skoon gemaak nie.</i>
10	EXI-SPE-PL	30 <i>Iemand het sowaar al die koek opgeëet!</i>
11	EXI-SPE-NN	31 <i>O gats! Iemand het my gehoor!</i>

TABEL 2: Bruikbare antwoorde vanuit die visuele vraelys vir elke onpersoonlike konteks

Die vraelys is op sosiale media versprei en in totaal het 451 Afrikaanssprekende respondente die aanlyn vraelys voltooi en ingedien. Deelname was anoniem en vrywillig, maar deelnemers kon aandui of hul wil deelneem aan 'n lukrake en gelukkige e-postrekking waardeur vier deelnemers 'n geskenkbewys van 'n aanlyn winkel ontvang het. Die deelnemers se kontakbesonderhede is nie in die datastel opgeneem nie.

Persone vanuit verskillende ouderdomsgroepe het die vraelys voltooi, asook persone van verskillende geslagte. Alle respondente was eerstetaalsprekers van Afrikaans, of meertalige sprekers wat aangedui dat hul Afrikaans so goed as eerstetaalsprekers handhaaf. Hoewel nie alle antwoorde wat respondente aangebied het, bruikbaar was om die onverpersoonlikingsstrategieë in Afrikaans te ondersoek nie, was alle vraelyste bruikbaar en is in die datastel opgeneem. Soos reeds genoem, is die vraag oor die

SAV-konteks nié by die studie ingesluit nie. Slegs 11 vrae se antwoorde is derhalwe in die studie betrek.

#### 4 DIE RESULTATE

Soos genoem, het 451 respondente in totaal aan die vraelys deelgeneem. 'n Paar opmerkings is hier ter sake: Eerstens, hoewel meeste respondente alle vrae in die vraelyste beantwoord het, is daar enkele vraelyste waarin nie alle vrae deur die respondent beantwoord is nie; tweedens het 'n respondent soms 'n vraag só beantwoord, dat die antwoord nie bruikbaar was vir die betrokke onpersoonlike konteks wat getoets word nie, maar eerder 'n ander persoonlike konteks. Daar was byvoorbeeld sommige respondente wat die UNI-EXT (met *Mense in China eet baie rys* as geskikte voorbeeld) beantwoord het as 'n UNI-INT-VER-konteks (byvoorbeeld *In China eet mens rys*). In 'n INT-konteks, beskou die spreker hom- of haarself as 'n persoon wat self ook rys sal eet wanneer hy of sy China besoek, terwyl 'n EXT-konteks die spreker by die situasie uitsluit. As vrae dus anders beantwoord is as waarvoor die betrokke visuele vraag ontwerp is, is die antwoorde nie by die resultate opgeneem nie; Derdens het sommige respondente meer as een onverpersoonlikingsstrategie in hul antwoorde aangewend. Elke onderskeibare strategie is apart gemerk. Vir 'n UNI-INT-NVER-MOD-antwoord soos "*Maak seker die sitplekgordel is stewig vasgemaak*" sal byvoorbeeld aangedui word die respondent 'n bevelsvorm as onverpersoonlikingsstrategie gebruik het, asook 'n agentlose passief; Laastens was sommige antwoorde meerduidelik in terme van 'n persoonlike of onpersoonlike interpretasie. Dit was byvoorbeeld nie duidelik in 'n antwoord soos *Ek moet my sitplekgordel vasmaak*, of die respondent bedoel het om na hom- of haarself te verwys nie, of na die totale mensdom – waarbinne hy of sy hom- of haarself inreken (vergelyk

ook Zobel 2015 oor die Duitse *ich*). Alle gevalle wat op hierdie wyse meerduidig<sup>7</sup> was, is by die resultate ingereken. Hoewel daar in totaal 451 vraelyste ontvang is, en hoewel elke vraelys een vraag per onpersoonlike konteks bevat het, is daar nie vir elke konteks noodwendig presies 451 antwoorde verskaf nie.

Tabel 3 bied 'n opsomming van die bruikbare antwoorde wat deur die respondente aangebied is.

Konteks	TOTAAL BRUIKBAAR	TOTAAL ONBRUIKBAAR	TOTAAL
UNI-INT-NVER-NMOD	382	68	450
UNI-INT-NVER-MOD	360	92	452
UNI-INT-VER	119	335	454
UNI-EXT	288	165	453
EXI-COR	362	77	439
EXI-VAG-PL	424	25	449
EXI-VAG-NN	343	107	450
EXI-INF-PL	221	227	448
EXI-INF-NN	371	78	449
EXI-SPE-PL	245	206	451
EXI-SPE-NN	187	224	411
TOTAAL	3302	1604	4906

TABEL 3: Opsomming van bruikbare antwoorde

---

<sup>7</sup> 'n Toets vir 'n moontlike meerduidige antwoord, was of die meerduidige konstruksie sinvol deur 'n ander onpersoonlike strategie, byvoorbeeld 'n onbepaalde voornaamwoord vervang kan word. Dit was byvoorbeeld moontlik om die 1.SG-voornaamwoord, *ek*, te vervang met die onbepaalde voornaamwoord *almal*. Die interpretasie van die sin sou dan sonder twyfel onpersoonlik wees. Daar sou egter antwoorde kon wees wat vir ons as taalkundiges as meerduidig was, maar wat die respondente nie as onpersoonlik bedoel het nie.



In totaal is 4906 antwoorde ontvang (’n gemiddeld van 446 antwoorde per konteks). Ongeveer ’n derde van die antwoorde (1604 antwoorde) was egter nie bruikbaar vir hierdie studie nie, aangesien dit óf nie voorbeelde was van onverpersoonlikingstrategieë nie, óf die respondent het nie die relevante onpersoonlike konteks met sy of haar antwoord beskryf nie. Hierdie aantal onbruikbare antwoorde is nie heeltewel onverwags nie, gegewe die aard van die vraelys (wat baie oop is) en die aard van die semantiese domein wat ondersoek word (wat baie moeilik is om te visualiseer en uit te lok). Nietemin is in totaal meer as 3300 antwoorde aangebied wat wél as geskikte en bruikbare voorbeelde van onverpersoonlikingstrategieë gereken kan word. Vir alle kontekste (met die uitsondering van die SAV-konteks) is boonop genoeg antwoorde aangebied om ’n verskeidenheid van moontlike onverpersoonlikingstrategieë te identifiseer, asook om voorlopige gevolgtrekkings te kan maak oor voorkeurstrategieë wat sprekers binne spesifieke kontekste aanwend.

Uit Tabel 3 is dit ook duidelik dat vir sommige kontekste meer bruikbare antwoorde verskaf is as ander kontekste. Vir die EXI-VAG-PL-konteks is byvoorbeeld 424 bruikbare antwoorde aangebied, terwyl vir die UNI-INT-VER-konteks slegs 119 bruikbare antwoorde aangebied is. Ons is egter van mening dat daar vir alle kontekste ’n genoegsame hoeveelheid bruikbare antwoorde verskaf is om sinvolle afleidings te maak oor die *moontlike* en *voorkeurstrategieë* van onverpersoonliking in Afrikaans.

Die resultate word vanuit drie perspektiewe bespreek. Eerstens word die totale resultate as ’n geheelbeeld geïnterpreteer. Tweedens word elke onderskeibare onverpersoonlikingstrategieë aangebied en bespreek en derdens kry die verskillende strategieë wat in elke afsonderlike onpersoonlike konteks gebruik is, aandag.


#### 4.1 Totale resultate van alle vraelyste se antwoorde

Vanuit die literatuur wat vroeër genoem is, is veral vier onverpersoonlikingstrategieë bekend wat in Afrikaans (maar ook ander Wes-Germaanse tale) gebruik word, naamlik i) persoonlike voornaamwoorde wat op onpersoonlike wyse aangewend word, soos *jy* en *hulle*; ii) die naamwoordstukke *(n) mens* en *(die) mense*; iii) onbepaalde voornaamwoorde soos *iemand* en *almal*; en iv) passiefkonstruksies.

Tabel 4 en Figuur 4 bied 'n opsomming van al die onverpersoonlikingstrategieë wat in al die antwoorde in al die vraelyste aangebied is deur Afrikaanse sprekers. Hier sien ons dat die genoemde vier strategieë inderdaad algemeen in Afrikaans aangewend word in onpersoonlike kontekste. Naas hierdie vier bekende strategieë, het respondente egter ook 'n aantal strategieë aangebied wat nog nie vantevore as onverpersoonlikingstrategieë in Afrikaans geïdentifiseer is nie. Hierdie strategieë sal in Afdeling 4.2 meer spesifieke aandag kry.

Onverpersoonlikingsstrategie		Sub-totaal	Totaal	Bruikbare voorbeeld uit vraelys
Persoonlike voornaamwoorde (PN.PERS)	PN.PERS.1.SG	306	1006	32 <b>Ek</b> maak altyd my sitplekgordel vas. (UNI-INT-NVER-MOD)
	PN.PERS.2.SG	127		33 Wat gebeur as <b> jy</b> die knoppie druk? (UNI-INT-NVER-NMOD)
	PN.PERS.1.PL	16		34 In die winter kry <b> ons</b> koud. (UNI-INT-VER)
	PN.PERS.2.PL	3		35 Maak seker dat <b> julle</b> sitplekgordels vasgemaak is wanneer <b> julle</b> ry. (UNI-INT-NVER-MOD)
	PN.PERS.3.PL	554		36 <b> Hulle</b> werk alweer aan die pad. (EXI-COR)
Onbepaalde voornaamwoorde (PN.INDF)	iemand	473	515	38 Ek dink <b> iemand</b> het my gehoor. (EXI-VAG-NN)
	almal	40		39 <b> Almal</b> moet hulle sitplekgordel vasmaak. (UNI-INT-NVER-MOD)
	elkeen	2		40 <b> Elkeen</b> moet hul sitplekgordel vasmaak. (UNI-INT-NVER-MOD)
				41
Gegrammatikaliseerde naamwoorde of naamwoordstukke (NP)	('n) mens	123	312	42 In die winter kry <b> mens</b> koud. (UNI-INT-VER)
	(die) mense	189		43 <b> Mense</b> in China eet baie rys. (UNI-EXT)
				44
Passiefkonstruksies (PASS)			955	45 Terwyl jy geslaap het <b> is</b> al die appels <b> gepluk</b> . (EXI-VAG-NN)
Ander moontlike onverpersoonlikingsstrategieë			510	
TOTAAL			3298	

TABEL 4: Opsomming van alle bruikbare antwoorde uit die visuele vraelys oor onverpersoonlikingsstrategieë in Afrikaans



*Figuur 4: Opsomming van alle bruikbare antwoorde uit die visuele vraelys oor onverpersoonlikingstrategieë in Afrikaans*

'n Aantal belangrike of opvallende afleidings kan gemaak word deur na die totale van die verskillende onverpersoonlikingstrategieë te kyk.

Eerstens is dit duidelik dat die voornaamwoordelike strategie – maar meer spesifiek, die gebruik van persoonlike voornaamwoorde in onpersoonlike kontekste – die mees algemene wyse is waarop 'n Afrikaanse spreker aantoon dat 'n bepaalde konteks onpersoonlik is. Dié resultate bevestig die belangrikheid van persoonlike voornaamwoorde<sup>8</sup> as onverpersoonlikingstrategie in taalgebruik wat deur 'n aantal navorsers aangetoon is (vergelyk byvoorbeeld – om maar enkeles te noem – Van der

---

<sup>8</sup> In die literatuur oor onpersoonlike konstruksies, word meestal na persoonlike voornaamwoorde wat in onpersoonlike kontekste aangewend word, verwys na "menslike onpersoonlike voornaamwoorde" (*human impersonal pronouns*). Hierdie onpersoonlike voornaamwoorde kan gedefinieer word as die "pronominal expression of impersonalization, i.e. the process of filling an argument position of a predicate with a variable ranging over sets of human participants without establishing a referential link to any entity from the universe of discourse" (Gast & van der Auwera 2013:124).

Auwera et al. 2012; Malamud, 2012; Deringer et al., 2015; en Rudolf 2014). Feitlik al die persoonlike voornaamwoorde (met die uitsondering van 3.SG) is in die resultate van ons vraelyste aangewend as onverpersoonlikingstrategieë. Die hoë frekwensie van die 2.SG en 3.PL kan verklaar word deur die verduidelikings van Van Olmen & Breed (2018a, 2018b), naamlik dat die gebruik van 2.SG 'n onverpersoonlikingstrategie is wat gereeld gebruik word in die UNI-INT-kontekste, terwyl die 3.PL die primêre onverpersoonlikingstrategie is wat gebruik word in alle EXI-kontekste, sowel as UNI-EXT-kontekste. Die hoë frekwensie van 1.SG skryf ons toe aan die meerduidige aard van die meeste van die antwoorde in die drie UNI-INT-kontekste, waar dit telkens nie heeltemal duidelik is of die respondent bedoel om op referensiële wyse na hom- of haarself te verwys nie (byvoorbeeld sin 32), of eerder op 'n niereferensiële wyse bedoel dat hy of sy deel vorm van die universele groep persone wat in die konteks ter sprake is (byvoorbeeld 34).

'n Tweede, taamlik verrassende afleiding wat uit die resultate gemaak kan word, is dat die gebruik van 'n passiefkonstruksie byna 'n ewe algemene onverpersoonlikingstrategie is as die voornaamwoordelike strategie. Byna 30% van alle onverpersoonlikingstrategieë wat Afrikaanse sprekers gebruik het, was passiefkonstruksies. Hoewel die literatuur oor onpersoonlike konstruksies die passief aandui as 'n moontlike strategie van onverpersoonliking, was dit onsens insiens egter nie in enige literatuur aangedui hoe belangrik die funksie wat die passiefkonstruksie as onverpersoonlikingstrategie verrig, werklik vir Afrikaanse sprekers is nie.

'n Derde interessante bevinding is naamlik die hoë frekwensie van die persoonlike voornaamwoord *jy* as onverpersoonlikingstrategie om die visuele onpersoonlike kontekste te beskryf. Van Olmen et al. (2019) dui naamlik aan dat beide *jy* en (*n*) *mens*

as onverpersoonlikingsstrategieë in die vier UNI-kontekste aangewend kan word. Dié twee strategieë is sinonimies en is derhalwe uitwisselbaar. Die respondente van die Afrikaanse voltooiataak (vergelyk weer Figuur 2), het derhalwe albei strategieë gebruik om die UNI-kontekste in hierdie vraelys te beantwoord. Van die twee strategieë, was die gebruik van *(n) mens* egter by verre meer gereeld deur respondente in die VT ingevul. In totaal is *(n) mens* naamlik 318 keer deur respondente as onverpersoonlikingsstrategie by UNI-kontekste ingevul, terwyl *jy* slegs 58 keer ingevul is. Ons het dus verwag dat respondente die UNI-kontekste in die visuele vraelys ook sou formuleer deur hoofsaaklik gebruik te maak van *(n) mens*. In hiërdie vraelys is die twee strategieë byna egter ewe gereeld gebruik – daar is in 127 antwoorde van *jy*<sup>9</sup> gebruik gemaak, en in 123 antwoorde van *(n) mens*. Die saak sal ook verder bespreek word in Afdeling 4.2.

Aangesien daar heelwat in die literatuur oor Afrikaanse onpersoonlike konstruksies (vergelyk Breed & Van Olmen 2017; Van Olmen & Breed 2018a; Van Olmen & Breed 2018b; Van Olmen et al. 2019; Outeurs goedgekeur vir publikasie; Groenen binnekort ingedien) oor dié onverpersoonlikingsstrategieë bekend is, gaan daar nie verder in die artikel aandag gegee word aan die vier reeds bekende strategieë nie, naamlik i) die gebruik van persoonlike voornaamwoorde om onpersoonlike betekenis uit te druk, ii) onbepaalde voornaamwoorde, iii) die naamwoordstukke *(n) mens* en *(die) mense*; en iv) die passiefkonstruksie.

---

<sup>9</sup> Weereens was nie altyd noodwendig duidelik of die respondente *jy* as persoonlik of onpersoonlik bedoel het nie. Maar aangesien alle 2.SG-antwoorde 'n meerduidige intepretasie kan hê, is dit wel hier gereken as 'n onverpersoonlikingsstrategie.

## 4.2 Die onderskeibare onverpersoonlikingstrategieë

In Tabel 4 is 'n opsomming gegee van die verskillende onverpersoonlikingstrategieë wat deur respondente gebruik is om die visuele onpersoonlike kontekste te illustreer. Daar is ook aangedui dat in 510 antwoorde ánder onverpersoonlikingstrategieë aangewend was as die vier reeds bekende strategieë. Hierdie antwoorde is verder gegroepeer en gekategoriseer, en word in Tabel 5 opgesom.

Beskrywing van strategie	Geskikte voorbeeld	TOTAAL
Gespesifiseerde NP	46 <i><b>Kwajongens</b> het sowaar al die appels gepluk terwyl jy geslaap het. (EXI-VAG-NN)</i>	221
Imperatief	47 <i>Maak nie saak wie jy is nie, <b>maak</b> altyd jou sitplekgordel <b>vas!</b> (UNI-INT-NVER-MOD)</i>	124
NP + PN.REL	48 <i><b>Die mense wat</b> gister hier sokker gespeel het, het hul bal hier vergeet. (EXI-INF-PL)</i>	81
Infinitief	49 <i>Kyk hoe lyk die verkeer! Is dit nou 'n tyd <b>om</b> aan die pad <b>te werk?</b> (EXI-COR)</i>	38
Nominalisering	50 <i><b>Vasmaak van</b> 'n sitplekgordel is verpligtend. (UNI-INT-NVER-MOD)</i>	12
Die NP impliseer 'n betrokke agent	51 <i>Daar was <b>terreuraanvalle</b> op ñ paar plekke in die stad gewees. (EXI-VAG-PL)</i>	16
Subjunktiewe Q-WHs	52 <i><b>Watter</b> vraat het al die koek opgeet? (EXI-SPE-PL)</i>	8
Vryekeuse-items (FKI)	53 <i><b>Enige iemand</b> wat 'n motor wil bestuur, moet hul vasmaak met 'n sitplekgordel. (UNI-INT-NVER-NMOD)</i>	3
Kwantifiseerder + NP	54 <i><b>Meeste</b> mense kry koud in die winter. (UNI-INT-NVER)</i>	4
Ken agentskap aan die NP toe	55 <i>Wat doen <b>die knoppie?</b> (UNI-INT-NVER-NMOD)</i>	2
Persoon of persone	56 <i>Daar het sekerlik meer as 3 <b>persone</b> hier gedrink gister. (EXI-INF-NN)</i>	1
TOTAAL		510

TABEL 5: Opsomming van ander onverpersoonlikingstrategieë

'n Eerste strategie wat sprekers gebruik het om nié die subjek nie referensieel te spesifiseer nie, is 'n strategie wat ons as "ander strategieë" geklassifiseer het. Hierdie strategie is egter nie werklik 'n onverpersoonlikingstrategie nie, maar eerder 'n strategie om 'n subjek as onbepaald uit te druk. Sprekers het in hierdie konteks veral

gebruik gemaak van 'n **gespesifiseerde naamwoord** om niereferensieel na 'n persoon of groep persone verwys. Die naamwoord is meestal 'n naamwoord wat relevant is tot die bepaalde konteks, en 'n naamwoord wat byvoorbeeld die aksie wat die subjek uitvoer insluit. So is die naamwoord "terroriste" byvoorbeeld gebruik om te verwys na 'mense wat terroristiese aanvalle uitvoer' of die naamwoord "motorbestuurders" gebruik om te verwys na 'mense wat motors bestuur'. Hoewel die naamwoorde dus verwys na 'n spesifieke persoon of persone binne 'n bepaalde konteks, is dit – net soos die naamwoordstuk *die mense* – 'n niereferensiële verwysing na 'n groep mense. Hierdie strategie word hoofsaaklik in eksistensiële kontekste gebruik, hoewel enkele gebruike hiervan ook in die UNI-INT-NVER-MOD-konteks voorkom (vergelyk sinne 57 – 65).

- 57 ***Twee spanne*** het gister hier sokker gespeel. (EXI-INF-PL)  
 58 ***Morsjorse*** het gister hier gesit en drink. (EXI-INF-NN)  
 59 ***Die klomp vrate*** het al die koek opgeëet voordat ek by die huis gekom het. (EXI-SPE-PL)  
 60 ***Die padwerkers*** werk al twee weke aan die pad. (EXI-COR)  
 61 *O gaats, die huismense* het my verseker nou gehoor. (EXI-SPE-NN)  
 62 ***Alle motorbestuurders*** moet ten alle tye hulle sitplekgordel vasmaak. (UNI-INT-NVER-MOD)  
 63 ***Die terroriste*** het verskeie tereuraanvalle op 'n paar plekke in die stad uitgevoer. (EXI-VAG-PL)  
 64 ***Chinese*** in China eet rys soos wat Suid-Afrikaners pap eet. (UNI-EXT)  
 65 ***Swernote*** het al die appels gepluk terwyl jy geslaap het! (EXI-VAG-NN)

Tweedens is veral 'n strategie aangewend om 'n uitdrukking in die **imperatiewe** vorm, oftewel as 'n bevelsin, uit te druk. Al die 124 antwoorde was egter aangebied in die UNI-INT-NVER-MOD-konteks, en die antwoorde was soortgelyk aan die sin wat in voorbeeld 47 aangebied is. Dit is dus duidelik dat die gebruik van die imperatief 'n onverpersoonlikingstrategie is wat spesifiek is tot modale onpersoonlike kontekste, en na alle waarskynlikheid beperk is tot modale kontekste wat 'n verpligting (byvoorbeeld 47), verbod (byvoorbeeld *Moenie links draai by daai kruispad vandag nie*),



toestemming (byvoorbeeld *Gooi sigaretstompies hier weg*) of aanbeveling (byvoorbeeld *Besoek gerus hulle webwerf*) uitdruk.

’n Derde algemene onverpersoonlikingsstrategie wat in ons resultate geïdentifiseer is, is om na die onpersoonlike subjek te verwys deur ’n menslike naamwoord te kies (byvoorbeeld *die mense* of *die ou*) en dan **met ’n betreklike bysin** te spesifiseer dat die persoon of persone relevant is tot die konteks wat beskryf word. Dit is daarom nie verrassend dat hiërdie strategie slegs in eksistensiële kontekste gebruik word nie. Die strategie is veral in die twee INF-kontekste aangewend, naamlik 73 keer (vergelyk voorbeelde 66 en 67). Die strategie is egter ook 5 keer gebruik om die subjek in die EXI-COR-konteks te beskryf (byvoorbeeld 68), en telkens ’n enkele keer om die EXI-SPE-PL-, EXI-VAG-NN- en EXI-VAG-PL-kontekste se onpersoonlike subjekte te omskryf (vergelyk voorbeeldsinne 69 – 71).

66 **Die mense wat** gister hier gedrink het, het hulle gemors net hier gelos. (EXI-INF-NN)

67 **Die ouens wat** gister hier sokker gespeel het, het hulle bal hier vergeet. (EXI-INF-PL)

68 Ek hoop **die mense wat** aan die pad werk maak gou daarmee. Dit veroorsaak te veel verkeersknope. (EXI-COR)

69 Ek gaan **die ou wat** al die koek opgeëet het nou ’n koekhou slaan! (EXI-SPE-PL)

70 **Hy wie** al die appels gepluk het terwyl j geslaap het sal saam die vòëls n ander deuntjie sing. (EXI-VAG-NN)

71 Ek hoop hulle vang **die mense wat** die terreuraanvalle uitvoer en sit ’n bom onder hulle. (EXI-VAG-PL)

Die gebruik van die **infinite weworm** van die werkwoord in die bysin waarin die onpersoonlike subjek voorkom, is ’n onverpersoonlikingsstrategie wat in beide universele en eksistensiële kontekste gebruik word. In ons resultate is dié strategie 38 keer gebruik, naamlik 14 keer in EXI-COR-kontekste gebruik (byvoorbeeld 72), een keer in EXI-VAG-PL (byvoorbeeld 73), 16 keer in UNI-INT-NVER-MOD (byvoorbeeld 74), twee keer in UNI-EXI (byvoorbeeld 75), en vyf keer in UNI-INT-VER (byvoorbeeld 76).

- 72 *Dink hoe gevaarlik dit is **om só langs die pad te werk!** (EXI-COR)*
- 73 *Blykbaar is die enigste manier **om** inwoners **te laat hardloop** is **om** tereuraanvalle op 'n paar plekke in die stad **uit te voer.** (EXI-VAG-PL)*
- 74 *Dis veiliger **om te ry** wanneer jy jou veiligheids gordel vasmaak. (UNI-INT-NVER-MOD)*
- 75 *Die rys prys in China is laag genoeg **om** heeldag dit **te kan eet.** (UNI-EXI)*
- 76 *In die winter is dit sleg **om koud te kry.** (UNI-INT-VER)*

**Nominalisering van die werkwoord** in die bysin waarin die onpersoonlike subjek voorkom, is ook 'n onverpersoonlikingstrategie wat in beide universele en eksistensiële kontekste gebruik is. In ons resultate is hiërdie strategie sewe keer in EXI-kontekste gebruik (vergelyk voorbeelde 77 tot 79), en tien keer in UNI-kontekste (vergelyk 80 tot 82)

- 77 ***Die gewerk aan die pad** mors my tyd! (EXI-COR)*
- 78 *Gister was hier weer **'n groot gedrink en rinkink!** (EXI-INF-NN)*
- 79 ***Die uitvoer van tereuraanvalle** op n paar plekke in die stad, is skrikwekkend. (EXI-VAG-PL)*
- 80 ***Die eet van rys** met amper alle maaltye in China is algemeen. (UNI-EXT)*
- 81 ***Die vasmaak van jou sitplekgordel** is verpligtend. (UNI-INT-NVER-MOD)*
- 82 *Die winter is **vir koud kry** gemaak. (UNI-INT-VER)*

Die twee laasgenoemde strategieë, die gebruik van die infinitiewe vorm van die werkwoord en die nominalisering van die werkwoord, hou egter sterk met mekaar verband, aangesien dit albei strategieë is wat die **niefiniëte** (*non-finite*) vorm van die werkwoord gebruik en dus geen subjek neem nie (vergelyk Biber et al. 1999:125).

Twee ander strategieë wat ook met mekaar verband hou, is die kies van naamwoorde of werkwoorde wat 'n deelnemende **agent impliseer** (byvoorbeeld sinne 83 tot 85), en om aan 'n nie-lewende naamwoord die eienskap van **agentskap toe te ken** (wat opsigself dan ook 'n deelnemende agent impliseer, byvoorbeeld sin 55 en 86). Hierdie twee strategieë word ook in beide UNI- en EXI-kontekste gebruik.

- 83 *Daar is nog baie **werk wat voorlê** voor hierdie pad gebruik kan word. (EXI-COR)*
- 84 *Daar was **terreuraanvalle** op ñ paar plekke in die stad gewees (EXI-VAG-PL)*
- 85 *Rys is China se **stapelvoedsel.** (UNI-EXT)*

86 **Die padwerke vorder goed. Hulle werk nou al drie weke om die pad klaar te maak.** (EXI-COR)

Hoewel die grafiese ontwerpers wat die visuele vrae geïllustreer het, dit nie doelbewus gedoen het nie, het 'n aantal van die kontekste wat in die vraelys aangebied is, 'n negatiewe betekeniskonnotasie, soos verwyf, beskuldiging of skok (vergelyk die respondentantwoorde wat in sinne 87 tot 89 aangebied word.) Dit wil voorkom of 'n onpersoonlike strategie wat respondente in hierdie kontekste aanwend, naamlik is om van "**subjektiewe vraagwoorde**" gebruik te maak om na die skuldige, dog onpersoonlike, agenssubjek te verwys. Hierdie vraagwoorde sal ook dan dikwels gekombineer word met 'n vloek- of skelwoorduitdrukking (byvoorbeeld *wie die moer*, *wie die hel* en *wie de fok*), of 'n beledigende naamwoord (byvoorbeeld *duiwel*, *varke* of *vrate*) om die subjek te beskryf. Hierdie strategie is egter beperk tot gebruik in onpersoonlike kontekste waaroor die sprekers sterk negatiewe emosies toon.

87 **Watse varke het gister hier geeet en drink en alles langs die asblik gegooi?** (EXI-INF-NN)

88 **Wie de fok het al die koek opgeëet?!** (EXI-SPE-PL)

89 **Wie de moer het al die appels gepluk gepluk terwyl jy gelê en slaap het?** (EXI-VAG-NN)

**Vryekeuse-items** (*free choice items*), oftewel VKI, is as onverpersoonlikingsstrategie gebruik in 'n aantal antwoorde. Vendler (1967: 80) verduidelik dat VKI aandui dat daar 'n vryheid van keuse vir die spreker en hoorder bestaan oor wie of wat bedoel of verstaan word, letterlik dus "no matter whom you select from among...". Daar is slegs drie onpersoonlike kontekste waarin hierdie strategie gebruik is, naamlik drie voorbeelde van EXI-INF-NN (byvoorbeeld sin 90), twee voorbeelde van EXI-INF-PL- (byvoorbeeld sin 91), en twee voorbeelde van UNI-INT-NVER-MOD-kontekste (byvoorbeeld sin 94).

90 **Wie ookal gister hier gesit en drink het, het 'n groot gemors agtergelaat.** (EXI-INF-NN)

91 **Wie ook al gister sokker gespeel het, het hulle sokkerbal hier vergeet.** (EXI-INF-PL)

92 **Wie ookal gister hier sokker gespeel het, het hul bal vergeet.** (EXI-INF-PL)

- 93 **Enige iemand** wat 'n motor wil bestuur, moet hul vasmaak met 'n sitplekgordel. (UNI-INT-NVER-MOD)
- 94 **Maak nie saak wie jy is nie**, maak altyd jou sitplekgordel vas! (UNI-INT-NVER-MOD)

Een van die minder algemene strategieë wat sommige respondente gebruik het in van die UNI-INT-kontekse, is om 'n naamwoord soos **mense** of 'n naamwoord wat 'n groep mense spesifiseer soos *motorbestuurders* te **kwantifiseer** om op so 'n wyse te spesifiseer watter persoon of persone by die konteks ingereken word. In die antwoorde op ons vraelyste is hoofsaaklik die telwoorde *meeste* (byvoorbeeld sin 95), *alle* (byvoorbeeld sin 96) en *elke* (byvoorbeeld 97), gebruik, maar ander telwoorde, byvoorbeeld *sommige* en *enkele* sou ook in hierdie strategie gebruik kan word.

- 95 **Meeste mense** kry koud in die winter. (UNI-INT-VER)
- 96 **Alle mense** moet te alle tye hulle veiligheids gordel dra wanneer hulle bestuur. (UNI-INT-NVER-MOD)
- 97 **Elke bestuurder** moet sorg dat sy of haar sitplekgordel vasgemaak is. (UNI-INT-NVER-MOD)

'n Laaste strategie wat ons raakgesien het, en waaroor ons eintlik verbaas is dat dit so min aangewend is deur die respondente, is die gebruik van die naamwoord *persoon* of *persone* om die subjek te beskryf. Gegewe die feit dat die naamwoord beteken "menslike wese, hetsy man, vrou of kind, wat nie nader bepaal of geïdentifiseer word nie" (WAT, 2020), is dit eintlik die ideale woord om te gebruik om na die onpersoonlike subjek in onpersoonlike kontekste te verwys. Nietemin is hierdie strategie slegs een keer in ons resultate aangetref (vergelyk sin 98).

- 98 *Daar het sekerlik meer as 3 persone hier gedrink gister.* (EXI-INF-NN)

### 4.3 Voorkeuronverpersoonlikingstrategieë vir elke onpersoonlike strategie

Die verskillende onverpersoonlikingstrategieë wat in elkeen van die elf onpersoonlike kontekste deur die respondente aangebied is, word in Tabel 6 opgesom.


	PN.PRS	PN.INDF	Passief	LW + mens/mense	Spesifieke NP	Imperatief	NP+ PN.REL	Infinitief	NP impliseer 'n betrokke agent	Nominalisering	WH-Q	Quantifier + NP	VKI	Ken agentskap aan NP toe	Persoon/persone	TOTAAL
UNI-INT-NVER-NMOD	302	6	26	47	0	0	0	0	0	0	0	0	0	1	0	382
UNI-INT-NVER-MOD	111	23	38	22	24	124	0	16	0	0	0	1	1	0	0	360
UNI-INT-VER	39	9	4	57	0	0	0	5	0	3	0	2	0	0	0	119
UNI-EXT	67	7	107	87	13	0	0	2	3	2	0	0	0	0	0	288
EXI-COR	198	4	119	12	0	0	5	14	6	3	0	0	0	1	0	362
EXI-VAG-PL	25	9	350	0	30	0	1	1	7	1	0	0	0	0	0	424
EXI-VAG-NN	38	166	63	1	73	0	1	0	0	0	1	0	0	0	0	343
EXI-INF-PL	41	89	49	3	24	0	12	0	0	0	0	0	2	0	0	220
EXI-INF-NN	29	54	88	75	55	0	61	0	0	3	1	1	0	0	1	368
EXI-SPE-PL	84	44	106	2	2	0	1	0	0	0	6	0	0	0	0	245
EXI-SPE-NN	72	104	5	6	0	0	0	0	0	0	0	0	0	0	0	187
TOTAAL	1006	515	955	312	221	124	81	38	16	12	8	4	3	2	1	3298

TABEL 6: Opsomming van onverpersoonlikingsstrategieë wat in elke onpersoonlike konteks gebruik is.

Hoewel 'n verskeidenheid van onverpersoonlikingsstrategieë in 'n verskeidenheid van onpersoonlike kontekste aangewend word, is dit opvallend dat daar wel vir sekere kontekste sterk voorkeure bestaan. In totaal is vyftien moontlike onverpersoonlikingsstrategieë in ons resultate raakgesien, maar nie alle strategieë is in alle kontekste aangewend nie, en sommige strategieë is heelwat meer frekvent in sommige kontekste as in ander.

#### 4.3.1 UNI-INT-NVER-NMOD

In die UNI-INT-NVER-NMOD-konteks is slegs vyf verskillende onverpersoonlikingsstrategieë aangewend (vergelyk voorbeelde 99 tot 103), maar die persoonlike voornaamwoord is die strategie wat die meeste hier aangewend is.



Figuur 5: Onverpersoonlikingsstrategieë van die UNI-INT-NVER-NMOD-konteks


- 99 Wat gaan gebeur indien **ek** hierdie knoppie druk? (PN.PRS.1.SG)  
 100 Wat gebeur as  **jy** die knoppie druk? (PN.PRS.2.SG)  
 101 Wat sal gebeur as  **iemand** die rooi knoppie druk? (PN.INDF)  
 102 Wat gebeur as  **mens** die rooi knoppie druk? (DET+ mens)  
 103 Wat sal gebeur as  **dié** knoppie **gedruk word**? (passief)  
 104 Wat **doen die knoppie**? (ken agentskap aan NP toe)

Die rede vir die hoë frekwensie van persoonlike voornaamwoorde kan egter ook toegeskryf word aan die feit dat dit hoofsaaklik die 1.SG-voornaamwoord wat gebruik is om dié visuele vraag te beantwoord, en dié antwoord is – soos ons reeds verduidelik het – meerduidig, want dit kan beide 'n persoonlike en onpersoonlike interpretasie he. Die 2.SG (vergelyk sin 100) is slegs 13 keer as antwoord aangebied, en die vraag kan daarom gevra word of die persoonlike voornaamwoord dan wêrklik 'n

voorkeuronverpersoonlikingstrategie vir UNI-INT-NVER-NMOD-kontekste is. Dit wil dus voorkom asof Afrikaanse sprekers graag van **(n) mens** en die **passiefkonstruksie** gebruik maak om 'n UNI-UNI-NVER-NMOD-konteks te beskryf.

#### 4.3.2 UNI-INT-NVER-MOD

'n Groot verskeidenheid onverpersoonlikingstrategieë is deur respondente aangebied om die UNI-UNT-NVER-MOD-kontekste te beskryf (vergelyk 105 tot 114).



Figuur 6: Onverpersoonlikingstrategieë van die UNI-INT-NVER-MOD-konteks

- 105 **Jy** moet jou sitplekgordel vasmaak. (PN.PRS)  
 106 **Elkeen** moet hul sitplekgordel vasmaak. (PN.INDF)  
 107 **'n Mens** moet **'n mens** se sitplekgordel vasmaak. (DET+mens)  
 108 'n Sitplekgordel moet **vasgemaak word**. (passief)  
 109 **Alle bestuurders** moet hulle sitplekgordel vasmaak. (spesifieke NP)  
 110 Onthou om altyd jou sitplekgordel vas te maak. (imperatief)  
 111 Dit is baie belangrik **om** altyd jou sitplekgordel **vas te maak**. (ininitief)  
 112 **Vasmaak van 'n sitplekgordel** is verpligtend. (nominalisering)  
 113 **Alle mense** moet te alle tye hulle veiligheids gordel dra wanneer hulle bestuur. (Quantifier + NP)  
 114 **Enige iemand** wat 'n motor wil bestuur, moet hul vasmaak met 'n sitplekgordel. (VKI)

Veral drie onverpersoonlikingstrategieë het taamlike voorkeur geniet by respondente, naamlik persoonlike voornaamwoorde, die imperatief en die passiefkonstruksie.

Ons het egter 'n ander patroonmatige formulering van die MOD-kontekste raakgesien, naamlik dat respondente die konteks met 'n komplekse sin beskryf, waarin die modale betekenis in die hoofsin uitgedruk word, en die onverpersoonlikingstrategie in die komplementbysin (vergelyk sinne 115 en 116).

115 **Die wet vereis dat** jy jou sitplekgordel vasmaak.


116 **Dit is belangrik dat** die sitplekgordel vasgemaak word.

Altesaam het twaalf respondente die MOD-onpersoonlike konteks op hierdie manier omskryf.

#### 4.3.3 UNI-INT-VER

Hoewel ten minste sewe verskillende onverpersoonlikingstrategieë aangewend is om die UNI-INT-VER-konteks te beskryf, is dit duidelik dat daar veral twee voorkeurstrategieë onder Afrikaanse respondente was, naamlik die gebruik van persoonlike voornaamwoorde en die gebruik van (*'n*) mens. Wat egter opmerklik is, is dat daar van meer as een persoonlike voornaamwoord gebruik is om hierdie konteks te omskryf. Dit is wel moontlik dat sommige antwoorde waarin persoonlike voornaamwoorde as 'n strategie gebruik is, 'n meerduidige (dus hetsy as persoonlik of onpersoonlik) interpretasie kan hê, maar in alle gevalle is dit wel moontlik om ook te kon aflei dat die spreker die voornaamwoord só gebruik het om na die hele mensdom te verwys (waarby hy of sy hom of haarself byreken).






Figuur 7: Onverpersoonlikingstrategieë van die UNI-INT-VER –konteks

- 117 *In die winter kry **ek** koud. (PN.PRS.1.SG)*
- 118 *In die winter kry  **jy**  koud. (PN.PRS.2.SG)*
- 119 *In die winter kry  **ons**  koud. (PN.PRS.3.SG)*
- 120 ***Almal** kry koud in die winter! (PN.INDF)*
- 121 *Die winter sal daar **koud gekry word**. (passief)*
- 122 ***Mens** kry in die winter koud. (mens)*
- 123 *In die winter is dit sleg **om koud te kry**. (infinitief)*
- 124 *Die winter is **vir koud kry** gemaak. (nominalisering)*
- 125 ***Meeste mense** kry koud in die winter. (Kwantifiseerder + NP)*

#### 4.3.4 UNI-EXT

Agt verskillende onverpersoonlikingstrategieë is gebruik om die UNI-EXT-konteks te beskryf, maar daar blyk 'n sterk voorkeurstrategie te wees vir hierdie konteks, naamlik

die passiefkonstruksie<sup>10</sup>. Verder is ook net een persoonlike voornaamwoord hier gebruik, naamlik 3.PL, oftewel *hulle*.




Figuur 8: Onverpersoonlikingstrategieë van die UNI-EXT-konteks

- 126 *In China eet **hulle** rys. (PN.PRS)*  
 127 *In China eet **almal** baie rys. (PN.INDF)*  
 128 *Orals in China **word** daar rys **geëet**. (passief)*  
 129 ***Chinese** eet baie rys. (spesifieke NP)*  
 130 *In China is dit algemeen **om** rys saam met die meeste etes **te eet**. (infinitief)*  
 131 *Rys is China se **stapelvoedsel**. (NP impliseer 'n betrokke agent)*  
 132 ***Die eet van** rys met amper alle maaltye in China is algemeen. (nominalisering)*

<sup>10</sup> Vanweë die feit dat die agens in 'n onpersoonlike passiefkonstruksie verswyg word, is dit ook moontlik dat die respondent hulself by die konsteks in sou kon inreken (dus as UNI-INT). Aangesien die antwoorde wél ook die vraag beantwoord het wat ons aan die respondente gebied het, het ons die antwoorde hier gereken as 'n onpersoonlike strategie.

#### 4.3.5 EXI-COR

Veral twee strategieë is algemeen gebruik om die EXI-COR-konteks te beskryf, naamlik weereens die gebruik van persoonlike voornaamwoorde (spesifiek PN.PRS.3.PL) en die passiefkonstruksie. Naas hierdie twee strategieë, het respondente ook nog sewe ander onverpersoonlikingsstrategieë aangewend (vergelyk sinne 133 tot 141).



Figuur 9: Onverpersoonlikingsstrategieë van die EXI-COR-konteks


- 133 **Hulle** werk alweer aan die pad. (PN.PRS)  
 134 **Iemand** werk daar voor in die pad. (PN.INDF)  
 135 Daar **word** aan die pad **gewerk**. (passief)  
 136 **Die mense** werk alweer aan die pad. (DET+mense)  
 137 Ek hoop **die mense wat** aan die pad werk maak gou daarmee. Dit veroorsaak te veel verkeersknope. (NP+PN.REL)  
 138 Jissie, **om so** aan die pad **te werk** is harde werk. (infinitief)  
 139 Hoekom is daar altyd **padwerke** in die oggend op die pad as jy moet gaan werk? (NP impliseer 'n betrokke agent)  
 140 **Die gewerk aan die pad** mors my tyd! (nominalisering)  
 141 Die **padwerke vorder** goed. (ken agentskap aan NP toe)

Wat vir ons opmerklik was, is dat daar in hierdie konteks nie deur 'n enkele respondent gebruik gemaak is van spesifieke naamwoorde (soos *padwerkers*) om die situasie te

beskryf nie. Selfs al het die situasie hom daartoe geleen om van hierdie strategie gebruik te maak, het respondente van ander meer eksplisiete onpersoonlike strategieë gebruik gemaak.

#### 4.3.6 EXI-VAG-PL

Die passiefkonstruksie is 'n besondere algemene onverpersoonlikingsstrategie in die EXI-VAG-PL-kontekste. Hoewel agt verskillende strategieë deur respondente aangebied is, is nie een van die ander strategieë werklik produktief aangewend nie. Slegs 25 respondente het byvoorbeeld van persoonlike voornaamwoorde gebruik gemaak, en slegs 30 respondente van spesifieke naamwoorde om na die onpersoonlike subjek ('n onbekende groep persone) te verwys.



Figuur 10: Onverpersoonlikingsstrategieë van die EXI-VAG-PL-konteks


- 142 **Hulle** het terreuraanvalle op 'n paar plekke in die stad uitgevoer. (PN.PRS)  
 143 **Iemand** het om 05h35 drie terreuraanvalle uitgevoer in die stad. (PN.INDF)  
 144 Daar **is** al weer terreuraanvalle op 'n paar plekke in die stad **uitgevoer**. (passief)  
 145 **Die terroriste** het terreuraanvalle op 'n paar plekke in die stad uitgevoer. (spesifieke NP)

- 146 *Ek hoop hulle vang **die mense wat** die terreuraanvalle uitvoer en sit 'n bom onder hulle. (NP + PN.REL)*
- 147 *Blykbaar is die enigste manier om inwoners te laat hardloop is **om** terreuraanvalle op 'n paar plekke in die stad **uit te voer**. (infinitief)*
- 148 *Die **terreuraanvalle** het op 'n paar plekke in die stad plaasgevind! (NP impliseer 'n betrokke agent)*
- 149 *Die uitvoer van **terreuraanvalle** op 'n paar plekke in die stad, is skrikwekkend. (nominalisering)*

#### 4.3.7 EXI-VAG-NN

Onbepaalde voornaamwoorde (spesifiek die voornaamwoord *iemand*) is die voorkeurstrategie vir EXI-VAG-NN-kontekste. Ook die passiefkonstruksie en spesifieke naamwoorde is strategieë wat gereeld deur respondente gebruik is om hierdie konteks te beskryf.


- 150 ***Hulle** het al die appels gepluk terwyl jy geslaap het. (PN.PRS)*
- 151 ***Iemand** het al die appels gepluk terwyl jy geslaap het! (PN.INDF)*
- 152 *Terwyl jy geslaap het, **is** al die appels **gepluk**. (passief)*
- 153 ***Die mense** het al die appels gepluk terwyl jy geslaap het! (DET+mense)*
- 154 ***Diewe** het al die appels gepluk terwyl jy geslaap het. (spesifieke NP)*
- 155 ***Hy wie** al die appels gepluk het terwyl jy geslaap het sal saam die vòëls n ander deuntjie sing. (NP+PN.REL)*
- 156 ***Wie de moer** het al die appels gepluk gepluk terwyl jy gelê en slaap het? (WH-Q)*



*Figuur 11: Onverpersoonlikingstrategieë van die EXI-VAG-NN-konteks*

#### 4.3.8 EXI-INF-PL

Sewe verskillende onverpersoonlikingstrategieë is deur respondente gebruik om die EXI-INF-PL-konteks te beskryf. Veral drie strategieë is deur heelwat respondente gebruik, naamlik persoonlike voornaamwoorde, onbepaalde voornaamwoorde en die passiefkonstruksie. Meer as 20 respondente het ook spesifieke naamwoorde gebruik om na die niereferensiële groep persone te verwys.




Figuur 12: Onverpersoonlikingstrategieë van die EXI-INF-PL-konteks

- 157 **Hulle** het gister hier sokker gespeel. (PN.PRS)  
 158 Ek sien **iemand** het gister hier sokker gespeel. (PN.IDF)  
 159 Hier **was** gister sokker **gespeel**. (passief)  
 160 Gister het **mense** hier sokker gespeel. (mense)  
 161 **Twee spanne** het gister hier sokker gespeel. (spesifieke NP)  
 162 Die bal behoort aan **die span wat** gister hier sokker gespeel het. (NP+PN.REL)  
 163 **Wie ook al** gister sokker gespeel het, het hulle sokkerbal hier vergeet. (VKI)

#### 4.3.9 EXI-INF-NN

'n Hele aantal onverpersoonlikingstrategieë is produktief in die EXI-INF-NN-konteks aangewend. In totaal is tien verskillende strategieë in hierdie konteks aangewend, met die passief en *mense* as die mees frekwente strategieë. Die rede hiervoor is waarskynlik omdat alle getalneutrale kontekste óók as meervoud geïnterpreteer kan word, en derhalwe is *mense* 'n geskikte strategie.



Figuur 13: Onverpersoonlikingsstrategieë van die EXI-INF-NN-konteks

- 164 **Hulle** het duidelik gister hier gedrink. (PN.PRIS)
- 165 **Iemand** het gister vreeslik hier gedrink. (PN.INDF)
- 166 Hier **is** gister groot **gedrink**. (passief)
- 167 **Mense** het gister hier baie gedrink. (mense)
- 168 Daar het 'n **klomp morsjorse** gister hier sit en drink. (spesifieke NP)
- 169 Kom ons tel **die mense wat** gister hier gedrink het se gemors op. (NP+PN.REL)
- 170 Gister was hier weer 'n **groot gedrink en rinkink!** (nominalisering)
- 171 **Watse varke** het gister hier geeet en drink en alles langs die asblik gegooi. (WH-Q)
- 172 **Een of ander vent** het gister hier gedrink (Kwantifiseerder+NP)
- 173 Daar het sekerlik meer as 3 **persone** hier gedrink gister. (persoon)


#### 4.3.10 EXI-SPE-PL

Ook in die EXI-SPE-PL-kontekste<sup>11</sup> is die passief die voorkeuronverpersoonlikingsstrategie, maar die twee voornaamwoordelike strategieë

<sup>11</sup> Vanuit die antwoorde wat deur die respondente aangebied is, is ons nie heeltemal seker of die respondente die konteks as EXI-SPE-PL- of as EXI-VAG/INF geïnterpreteer het nie. Ons is egter van



is ook gereeld deur respondente gebruik. Sewe verskillende strategieë is deur respondente gebruik om hierdie konteks te beskryf.



Figuur 14: Onverpersoonlikingstrategieë van die EXI-SPE-PL-konteks

- 174 *Hulle het wragtig al die koek opgeeet! (PN.PRS)*  
 175 *Iemand het sowaar al die koek opgeëet! (PN.INDF)*  
 176 *Al die koek is opgeëet! (passief)*  
 177 *Die mense het al die koek opgeëet! (LW+mense)*  
 178 *Die klomp vrate het al die koek opgeëet voordat ek by die huis gekom het. (spesifieke NP)*  
 179 *Ek gaan die ou wat al die koek opgeëet het nou 'n koekhou slaan! (NP+PN.REL)*  
 180 *Wie der duiwel het al die koek opgeëet! (WH-Q)*


#### 4.3.11 EXI-SPE-NN

Slegs vier onverpersoonlikingstrategieë is gebruik om die EXI-SPE-NN-konteks te beskryf, en die twee voornaamwoordelike strategieë is die mees algemene. Enkele

---

mening dat die resultate vir ons insigte bied oor die wyse waarop Afrikaanse sprekers 'n SPE-konteks sou kon beantwoord, en derhalwe interpreteer ons die antwoorde van dié konteks, soos aangebied deur die respondente.

respondente het ook van 'n passiefkonstruksie en *mense* gebruik gemaak as 'n strategie.



Figuur 15: Onverpersoonlikingstrategieë van die EXI-SPE-NN-konteks

- 181 **Hulle** het my gehoor! (PN.PRS)  
 182 **Iemand** het dit gehoor! (PN.INDF)  
 183 'n Geluid **is** gehoor (passief)  
 184 Nou het **die mense** my beslis gehoor! (DET+mense)

## 5 SAMEVATTING

Die doel van hierdie artikel was om eerstens te bepaal watter moontlike onverpersoonlikingstrategieë deur Afrikaanse sprekers aangewend kan word om onpersoonlike kontekste te beskryf, en tweedens te sien of daar bepaalde voorkeure vir sprekers bestaan oor watter strategieë om te gebruik in verskillende en onderskeibare onpersoonlike kontekste.

Die resultate van die visuele vraelys het dit wél moontlik gemaak om 'n verskeidenheid van moontlike onverpersoonlikingstrategieë te identifiseer. In vorige literatuur oor onverpersoonlikingstrategieë in Afrikaans (maar ook Wes-Germaans) is slegs vier moontlike strategieë aangebied as moontlike maniere waarop sprekers kontekste as onpersoonlik beskryf. Die resultate van ons vraelys het ons egter gewys dat daar meerdere strategieë tot Afrikaanse sprekers se beskikking is, en in totaal is daar van **vyftien onderskeibare onverpersoonlikingstrategieë** gebruik gemaak om die kontekste in ons vraelys te beskryf. Die vraelys sou volgens ons ook bruikbaar kan wees om 'n verskeidenheid van onverpersoonlikingstrategieë in ander tale te kan identifiseer en op kontrastiewe wyse die resultate van die verskillende tale met mekaar te kan vergelyk, om sodoende die lys van moontlike onverpersoonlikingstrategieë in Wes-Germaans aan te vul.

Die resultate het ook 'n aantal voorkeurstrategieë aangedui vir elke onderskeibare onpersoonlike konteks. Drie strategieë is bruikbaar in alle onpersoonlike kontekste, naamlik die gebruik van persoonlike voornaamwoorde, onbepaalde voornaamwoorde en die passief. Verder is die naamwoordstukke, naamlik *(n) mens* en *(die) mense*, ook strategieë wat gereeld aangewend word, hoewel nie in VAG-kontekste nie, ook tot 'n mindere mate in die SPE-kontekste.

## 6 VERWYSINGS

Arif M.M. & Hashim F. 2008. Reading from the Wordless: A Case Study on the Use of Wordless Picture Books. *English Language Teaching*, 1(1):121-126.

Botha, W.F. (red). 2019. *e-WAT: elektroniese woordeboek van die Afrikaanse taal*. <http://www.woordeboek.co.za.nwulib.nwu.ac.za/> [19 Oktober 2019].

- Breed, A. & Van Olmen, D. 2017. Menslike onpersoonlike voornaamwoorde in Nederlands vanuit 'n dubbelvraelysaanpak – 'n vergelyking met Afrikaans. *Tydskrif vir Nederlands en Afrikaans*, 2017(2).
- Coussé, E. & van der Auwera, J. 2012. Human impersonal pronouns in Swedish and Dutch: A contrastive study of man and men. *Languages in Contrast* ,12: 121-138.
- Deringer, L., Gast, V., Haas, F. & Rudolf, O. 2015. *Human impersonal pronouns in populist discourse*. Invited talk at workshop "Interdisciplinary perspectives on populist discourse in Germany and Poland", August 20-21, 2015. Institut für Anglistik/Amerikanistik, Friedrich-Schiller-Universität Jena.  
[https://scholar.google.com/scholar?hl=nl&as\\_sdt=0%2C5&q=%22human+impersonal+pronouns%22+haas&btnG=](https://scholar.google.com/scholar?hl=nl&as_sdt=0%2C5&q=%22human+impersonal+pronouns%22+haas&btnG=) [20 Oktober 2020].
- Egerland, V. 2003. Impersonal Pronouns in Scandinavian and Romance. *Working Papers in Scandinavian Syntax*. Department of Scandinavian Languages, Lund University.
- Fouché, N. & Kapp, S. 2020. Persoonlike voornaamwoorde. *Taalonderrigportaal*. Die Virtuele Instituut vir Afrikaans (VivA). [https://viva-afrikaans.org/portale/taalonderrigportaal?link=Afdeling-Woordsoorte%2FVoornaamwoord%2FAAG\\_Woordsoort\\_PN\\_Soorte\\_Persoonlik.html](https://viva-afrikaans.org/portale/taalonderrigportaal?link=Afdeling-Woordsoorte%2FVoornaamwoord%2FAAG_Woordsoort_PN_Soorte_Persoonlik.html). [20 Oktober 2020].
- Garcia, B., Sallandre, M. & L'Huillier, M. 2018. Impersonal human reference in French Sign Language (LSF). *Sign Language and Linguistics*, 21(2): 307-333.

- Gast, V. & van der Auwera, J. 2013. Towards a distributional typology of human impersonal pronouns, based on data from European languages. In Bakker & Haspelmath (eds). *Languages Across Boundaries: Studies in the Memory of Anna Siewierska*. Berlin: Mouton de Gruyter, pp. 119-158.
- Groenen, G. Binnekort ingedien. Hoe onpersoonlijk is persoonlijk?: Een contrastief corpusonderzoek van de Afrikaanse en Nederlandse persoonlijke voornaamwoorden jy/je en hulle/ze. Potchefstroom: Noorwes-Universiteit. [MA-verhandeling]
- Hoekstra, J. 2010. On the impersonal pronoun men in Modern West Frisian. *The Journal of Comparative Germanic Linguistics*, 13(1): 31–59.
- Horwat, J. 2018. Too subtle for words: doing wordless narrative research. *Art/Research International: A Transdisciplinary Journal*, 3(2): 172-195.
- Kirsten, J. 2016. *Grammatikale Verandering in Afrikaans van 1911-2010*. Vanderbijlpark: North-West University.[ PhD-proefskrif].
- Kitagawa, C. & Lehrer, A. 1990. Impersonal uses of personal pronouns. *Journal of Pragmatics*, 14(5): 739-759.
- Luukka, M. & Markkanen, R. 1997. Impersonalisation as a form of hedging. In Markkanen & Schröder (eds). *Hedging and Discourse: Approaches to the Analysis of a Pragmatic Phenomenon in Academic, Research in Text Theory*. Berlin: De Gruyter, pp. 168-187.
- Malamud, S.A. 2012. Impersonal Indexicals: One, You, Man, and Du. *The Journal of Comparative Germanic Linguistics*, 15(1): 1-48.

- Malchukov, A.L. & Siewierska, A. 2015. *Impersonal Constructions: A cross-linguistic perspective*. Amsterdam: John Benjamins
- Marin-Arrese, E.M., Neff, J., Pérez de Ayala Becerril, S., Gómez, M.L.B. & Ávila, C.M. 2001. A corpus study of impersonalisation strategies in newspaper discourse in English and Spanish. In Rayson, Wilson, McEnery, Hardie & Khoja (eds). *Proceedings of the Corpus linguistics 2001 Conference, 29 March – 2 April 2001, Lancaster, UK. University Centre for Computer Corpus Research on Language*. Lancaster: UCREL, 13: 369–377.
- Nodelman, P. 1990. *Words about pictures*. Georgia: University of Georgia Press.
- Outeurs [anoniem]. Goedgekeur vir publikasie. The passive as an impersonalisation strategy in Afrikaans and Dutch: A corpus investigation. *Dutch Crossing*.
- Outeurs [anoniem]. Ingedien vir publikasie. Developing and validating a visual questionnaire for the study of impersonalisation strategies: A design thinking approach
- Outeurs geanonimiseer. Ingedien vir publikasie. Developing and validating a visual questionnaire for the study of impersonalisation strategies: A design thinking approach. [Artikel voorgelê vir publikasie]
- Pharos. 2006. "Onpersoonlik". *Sinonieme en verwante woorde*. Kaapstad: NB Uitgewers.
- Rudolf, O. 2014. A Corpus-Based Study of Human Impersonal Constructions in Russian, In Witkos & Sylwester (eds). *New Insights into Slavic Linguistics-*

*Series Title Sprachund Kulturkontakte in Europas Mitte*. Bern: Peter Lang, pp. 329-343.

Siewierska, A. & Papastathi, M. 2011. Towards a typology of third personal plural impersonals. *Linguistics*, 49(3): 575-610.

Siewierska, A. 2008. Ways of impersonalising: Pronominal vs verbal strategies. In de los Ángeles Gómez, Maria, Mackenzie & González Álvarez (eds). *Current Trends in Contrastive Linguistics: Functional and cognitive perspectives*. Amsterdam: John Benjamins, pp. 3-26.

Siewierska, A. 2011. Overlap and complementarity in reference impersonals: Man-constructions vs. third person plural-impersonal in the languages of Europe. In Malchukov & Siewierska (eds). *Impersonal Constructions: A Cross-Linguistic Perspective*. Amsterdam: John Benjamins, pp. 57-89.

Van der Auwera, J., Gast, V. & Vanderbiesen, J. 2012. Human impersonal pronouns in English, Dutch and German. *Leuvense Bijdragen*, 98(1): 27-64.

Van Olmen, D. & Breed, A. 2018a. Human impersonal pronouns in Afrikaans: A double questionnaire-based study. *Language Sciences*, 69:1-29, September. <https://doi.org/10.1016/j.langsci.2018.05.002> [20 Oktober 2020]

Van Olmen, D. & Breed, A. 2018b. Human impersonal pronouns in West Germanic: A questionnaire-based comparative study of Afrikaans, Dutch and English. *Studies in Language* 42(4): 798 – 846

Van Olmen, D., Breed, A. & Verhoeven, B. 2019. A corpus-based study of the human impersonal pronoun (n) mens in Afrikaans. *Languages in Contrast*. 19(1): 79–105. <https://doi.org/10.1075/lic.17004.van> [19 Oktober 2020]

Vendler, Z. 1967. *Linguistics in Philosophy*. Ithaca: Cornell University Press

Virtuele Instituut vir Afrikaans (VivA). 2020. *Korpusportaal: Omvattend 1.7*. <http://viva-afrikaans.org>. [19 Oktober 2020].

Zobel, S. 2015. A pragmatic analysis of german impersonally used first person singular 'ICH'. In: The referential ambiguity of personal pronouns and its pragmatic consequences. De Cock & Kluge (eds). *Pragmatics*, 26(3): 379-416.